

## VIDEO

### Ing Kasalesayan ning Our Lady of the Holy Rosary Parish

i. ING PAMITANAM NING KASALPANTAYANAN (ING UMPISA NING PAROKYA)

Megumpisa ya iting kasalesayan keta pang minunang panaun, inyang ala pang makatuknang maski metung man tau king metung a malwalas a mula o gabun. Inyang sekupan de ring Kastila ing Pilipinas, iting gabun mipanibala ya karing *encomiendero*. Deti ila pin ding taung mirinan upaya karing Kastila lalam ning batas a **Encomienda System** ban gawan dang asikan a pitamnan at makapangabyayan la.

Migpalipat-lipat iting upayang mipagkalub karela karing meging sapni ra at miyaliwang enerasyon. Kabilang la kareti ring familyang *Singian* at *Escaler*. Ing gabun ning Barrio Sto. Rosario Pau, metung yang malwalas a gabun a mipanibala kanita karing familyang *Singian* at *Escaler*. Makasakup ya iting lugal kanita king balen San Fernando, Lalawigan ning Pampanga. Agpang karing minunang makatwa, marakal la ring makatanam a mangga king lugal ayti. “**Manggang Pau**” ing awus da kareti. Darayuan de ring taung menibatan karing miyaliwang lugal iting **barrio** ban mamulut o managtal manga, inya pin ding minunang tau inawus deng “Pau” kanita iting lugal.

Migit pa king metung a dekada bayu ne sekupan ning bansang Hapon ing Pilipinas, i **Santiago Miranda** a ausan dang Apung Tiago, makatuknang king Pandaras (*iting lugal Sitio ne pa mu kanita ning Pau*), ikit neng gato-gato kanita kabang manasan ya king ilug ing imahe na ning Virgen Sto. Rosario. Ala nang mekatanda nung nanung eksaktung petsa inyang milyari iti. Megawa ya iti king **ivory** at labinglimang pulgada (**15 inches**) ing sukad na. Neng atin okasyon antimo ing *Maleldo*, *Pasku* at *Barrio Fiesta*, iting imahe ning Virgen Sto. Rosario Andaman de king pamilya nang Santiago Miranda ban ibili ra king altar ning bisitas (*chapel*) a megawa mu king pinawud, sawali at kwayan. Angga na king dinatang ing panaun, ding memaryu tiki re lagyu king “Manggang Pau” at king lagyu na ning imahe iting lugal at inawus deng Barrio Sto. Rosario Pau.

*Iti ya ing imahe ning Virgen Sto. Rosario, ing ikit nang gagato king ilug Santiago Miranda ketang minunang panaun.*



(1)

Dinatang ing banwang 1952, buri ra nang isundu kanita ring memaryu ning Pau ing pamag-fiesta balang April 27. Kinonsulta ra iti kang Rev. Fr. Fidel M. Dabu, ing kasalukuyan a Kura Paroko kanita king *St. Thomas the Apostle Parish*, balen ning Sto. Tomas. Inawad na ning Pari karing sibabala ing kunan de pa mu karing pamilya nang **Santiago Miranda** ing Patrun a inuli ra na king bale ra Pandaras. Kailangan kanu ing ipilmi ra ne iti king altar ning bisitas bayu na la dinan kapayintulutan ban isundu ing pamagselebra king **Barrio Fiesta** kanita.

Pero ali ra meyapan iti ring pamilya nang Santiago Miranda, uling atin na la pin malating bisitas mu naman kanita at meging bayu neng barrio ning San Fernando kanita ing Sitio Pandaras. Karin da ne bibili king altar ning bisitas da ing imahe ning Virgen neng atin lang Misa o aliwa pang okasyon.

Kanita mu rin, pigkalub neng Don Marcos ing imahe ning Virgen ning Sto. Rosario a menibat at pepamana na keyang tatang na y Apung Digu (**Benigno Pineda**). Ing sukad na niting imahe eksaktu yang **apat a talampakan (4 feet)**.

Agpang king kasaysayan, ibat ya iting imahe karing pipumpunan nang Apung Digo ketang panaun a sasakupan de pa ring Kastila ing gubyernung Pilipinas. Iting imahe ing binili ra king sentru na ning altar ning bisitas ning barrio.

Uli na niti, dininan na lang kapaintulutan Padre Dabu ban mag-*fiesta* na la. Iti simbolu ne anting pamamyé kapasalamatan da ring memaryu king Dios at king Mal a Virgen Sto. Rosario ulining marakal a pupul mangga, pale, gule at saganang pagkabile.

(2)

Balang banwa na kanita, ring anak nang Don Marcos Pineda, i Apung Usta (**Fausta Pineda-Paredes**) at Apung Taki (**Joaquin Q. Pineda**) ila na ring memuntukan at miyadwangan king pamagsadya at selebrasyon ning Barrio Fiesta kanita. Makayantabe la naman kanita ring kapatad dang i **Gregorio, Josefa, Ruben, Dominador, Jose at Flora**.

Banwang 1955 inyang miyalal ne anting Alkalde ning balen i **Emilio T. Mercado**. Ikit na ning alkalde ing merakal na la ring taung sisimba kanita at e la mipagyu ngan ding sisimba uling malati ya mu pin ing bisitas.

Pepagawa ne ning malugud a alkalde ing malating bisitas ning Sto. Rosario Pau ban maging malwalas, mika-sasag yang tabla at mikabubung yang yeru. Inyang meyarine ing bisitas ketang 1956, mete ne at minuli ne karin king sumangid a bie i Don Marcos Pineda.

Kanitang banwang 1964, meging Alkalde ne ning balen Sto. Tomas ing anak nang Don Marcos S. Pineda, i Apung Taki (**Joaquin Q. Pineda**) a manuknangan mu naman king Barrio Sto. Rosario Pau. King saup da at kontribusyun ding memaryu, i Apung Taki at ding miyasawang **Santiago at Fausta Pineda-Paredes** penimunan da ing pamag-**renovate** king bisitas ban tumibe yang lakwas. Meging konkreto ne ngan at mepintura ya pa iti.




*Iti ya ing Mal a Larawan ning Virgen Sto. Rosario a amana ra pa karing pipumpunan da ri **Don Marcos S. Pineda**. Iting imahe iyang binili ra kanita king sentru ning altar ning bayung bisitas ning Barrio Sto. Rosario Pau iniang 1952. Pepa-restore ne ning PPC iting imahe ketang banwang 2013.*

(3)



*Iti ya ing bisitas a pepagawa nang Ex-Mayor Emilio T. Mercado iniang 1955.*





*Iti ya ing bisitas a pisaup-saup dang pepagawa ring memaryu king pamanimuna nang Ex-Mayor Joaquin Q. Pineda at ding miyasawang Santiago at Fausta Pineda-Paredes ketang 1964.*

(4)



*Iti ya ing altar ning bisitas a pisaup-saup dang pepagawa ring memaryu king pamanimuna nang Ex-Mayor Joaquin Q. Pineda at ding miyasawang Santiago at Fausta Pineda-Paredes ketang 1964.*

Ulining milalablab dang kasalpantayanan ding tau, meninap la at megnasang italakad ya anting metung a parokya ing Sto. Rosario Pau. Meging masigasig la kanita ri Apung Mary (**Maria T. Figueroa**), ing kasalukuyan a **Chairman** na kanita ning **Barangay Pastoral Council** (BPC) keti king Barangay Sto. Rosario Pau.

Ding meging kayantabe na kanitang Apung Mary ila pin di **Luis Figueroa**, ding miyasawang **Donato** at **Virginia Castro**, **Felicisima Zablan-Baluyut**, **Elpidio Calalang**, **Kapitan Jesus Catacutan** at king suporta nang **Rev. Msgr. Eugenio S. Mercado Jr.**, ing kasalukuyan a Kura Paroko kanitang makasakup ya pa king Parokya nang San Matias Apostol ing Barangay Sto. Rosario Pau.

Uliniti, king makuyad a panaun, mitalakad ya anting parokya ing dating bisitas. Ing lote o gabun a pitalakaran ning pisamban at ning malati pa mung kumbentong tuknangan ning pari, pigkalub de ring pamilya nang Apung Usta (**Fausta Pineda-Paredes**), anak nang babaing Don Marcos Pineda.

Milaguyan yang OUR LADY OF THE HOLY ROSARY PARISH iting parokya. Me-**installed** ya anting mumunang diling Kura Paroko i Rev. Fr. Arnold S. Rivera ketang December 13, 1991. Akayantabe ne kanita i Tatang Pidiong (**Elpidio G. Calalang**), ing minunang diling **Parish Pastoral Council (PPC) President** ning parokya. Migit king adwang banwa ing pamanungkulan nang Tatang Pidiong anting **PPC President**.

(5)

Iting okasyon tegunan de ring kaparian keti king Arkidiosesis ning San Fernando, king pamanimuna nang **Arsobispo Paciano B. Aniceto**, ding atlung (3) alkalde ning balen San Fernando, Sto. Tomas at San Simon at ding dakal a taung menibatan karing miyaliwang lugal at ding parokyanos.

Lima (5) la pa mu kanita ring barangay a makasakup king parokya. Ila pin deti ring Barangay Sto. Rosario Pau (*Sto. Tomas*), Barangay Pandaras (*San Fernando*), Barangay De la Paz, Barangay San Pablo Libutad at Barangay San Pablo Propio (*San Simon*). Pero kaniting panaun a misusulat ya iting libru ning kasalesayan, anam (6) na la ring sasakupan na ning parokya. Miragdag ya kareti ing **NAYONG TSINOY Community**. Iting lugal bayu yang talakad a komunidad karin king Barangay San Pablo Propio (*San Simon*).

(Insert Pictures of Chapel of Pandaras, Delapaz, Libutad, Propio and Nayong Tsinoy Here)

## II. ING SIBUT NING KASALPANTAYANAN (PAMISULUNG NING PAROKYA)

Ketang September 12, 1992, pisanmetungan da ring pamuntuk na ning **Parish Pastoral Council (PPC)** at Among Arnold ing mag-fiesta ya balang October 7 ing parokya uling aldo ne ning Fiesta ning **Holy Rosary** ita. Inia pin ing mumunang diling pamag-fiesta ning parokya meganap ketang October 7, 1992. Maski maragul at malamalam ing albug kanita king mabilug a parokya, meganap iti king mitmung kasimpliyon pero meging masaya la ring parokyanos kanita. Makanyan man, sindu ra pa mu rin ding tau Pau ing pamag-fiesta (*Barangay Thanksgiving Day*) balang tawling Domingo (**last Sunday**) ning Abril.

Masipag ya at malekaran i Among Arnold. King pamamastul na inyang banuang 1993, pepalacak ne ing malating dating bisitas a meging pisamban uli ning panga-parokya na niting lugal.

Ala man pabanwa ing milabas, mitalakad ya't meging bayu at maragul ing pisamban king pamisaupan da kanita ring parokyanos at ning **Parish Pastoral Council (PPC)**. Ing **PPC** pemuntukan ne kanitang **Mrs. Ofrecina F. Intal**. Mebendisyun ya iting bayung pisamban kang **Arsobispo Paciano B. Aniceto** at **Obispo Jesus C. Galang** ketang Mayo 01, 1994.

*Iti ya ing pisamban a mitalakad ketang panaun nang pamamastul **Rev. Fr. Arnold S. Rivera** anting mumunang diling Kura Paroko. Mebendisyun ya iti kang **Arsobispo Paciano B. Aniceto** at kang **Obispo Jesus C. Galang** ketang Mayo 01, 1994.*



(6)

Inyang eleksyun ning banuang 1994, mipuk ne man anting bayung Kapitan kanita i Tatang Mari (**Abelardo C. Salas**) a mas kilala ra king aus a “Kapitan Pogi”. Inalilan ne king pamanungkulan i Tatang Susing. Maragul ing papil nang Kapitan Pogi king pamisaupan da kanita ring parokyanos para king pamaglikum pondu at pamipagawa na ning pisamban, lalam nang pamanantabe kanita ning popular a pulitiku king balen Sto. Tomas, i Tatang Berong (**Ricardo F. Zablan**).



*Iti ya ing altar ning pisamban ketang banwang 1994 a megawa ketang panaun nang pamamastul **Rev. Fr. Arnold S. Rivera** anting mumunang diling Kura Paroko.*

Inyang November 5, 1996, midistinu ya anting Kura Paroko keti king *Our Lady of the Holy Rosary Parish* i **Rev. Fr. Exequiel Laudemer “Lauds” Mangune**.

King pamamastul nang Among Lauds, meg-**appoint** yang *Barangay Pastoral Council* (BPC) inyang banuang 1997 king sentru ning parokya, ing Barangay Sto. Rosario Pau. I **Bro. Briccio “Brix” U. Pineda** ing mumunang diling meging *Chairman* na ning BPC keti king sentru ning parokya. I Bro. Brix apu ne king tud Don Marcos S. Pineda, ing *fundador* na ning Barangay Sto. Rosario Pau.

King pamisaupan da ri Among Lauds, Bro. Brix, at Mrs. Ofrecina F. Intal, ing kasalukuyan a *PPC President* ketang panaun ayta, mekapaglikum lang pondu ban kanita ma-**renovate** ya ing altar ning pisamban. King malagwang panaun, megawa ya at mebendisyun iting mibayung altar inyang Mayo 02, 1998. E binang meglambat kanita, mete ya i Bro. Brix Pineda. Kasalukuyan na pang manungkulan kanita anting BPC Chairman king sentru ning parokya (Brgy. Sto. Rosario Pau).

(7)





*Iti ya ing altar ning pisamban a pepa-**renovate** na ning PPC at BPC (sentro) inyang banuang 1998, kanitang i Rev. Fr. Lauds H. Mangune ing Kura Paroko.*

Ulining maranun nang kamatayan Bro. Brix kanita, miyalal ya antimong *BPC Chairman* i **Bro. Luther C. Cordero**. I Bro. Luther apu ne mu naman king tud Don Marcos S. Pineda.

Masipag ya naman at malekaran i Bro. Luther. King suporta ra at pamiyadwangan da ila ri Among Lauds at Mrs. Ofrecina F. Intal, ing kasalukuyan a *PPC President* kanita, mekapaglikum la naman pondu ban mitalakad ya ing bayung kumbento. Iting kumbento iyang tuknangan da ring paring mididistinu keti king parokya. Mebendisyun ya iting kumbento ketang March 25, 2001.

King lideratu na naman Bro. Luther, karin megumpisa ing pamag-LIBAD king Indung Virgen ning Sto. Rosario king ilug neng daratang ing aldo ning fiestang parokya. Oneng inyang mika-sakuna at dakal la ring digsu mengalumud, pepatuknang da na ring parokyanos ing libad king ilug.

(8)





*Iti ya ing kumbentong tuknangan da ring mididistinung Kura Paroko. Mitalakad ya iti kanitang panaun nang pamamastul Rev. Fr. Lauds H. Mangune keti king parokya.*



*Neng daratang ing fiestang parokya balang October 7, anti kaniti ing magaganap a LIBAD king ilug ketang panaun nang Among Lauds H. Mangune.*

(9)

Inyang midistinu ne keti king parokya i **Rev. Fr. Aristotle M. Maniago**, miyalilan yang masanting at maragul a retablo iting altar ketang banuang 2015.





*Ing altar at bayung retablo ning pisamban a mitalakad kanitang I Rev. Fr. Aris M. Maniago ing Kura Paroko. Iting altar me-rededicate ya king pamagelebra nang **Archbishop Dong Lavarias** inyang April 26, 2015.*





Kapamilatan nang Rev. Fr. Jowel Jomarsus P. Gatus, megawa ya ing bayung Escudo de Armas o **parish logo** ning Parokya. Manibat inyang metatag ya ing parokya, meka-atlu neng **parish logo**. At ing peka-bayung escudo tatalakad ya anting opisyal a sagisag ning pamisanmetung da ring sablang memaryu at memalen a sasakupan na ning parokya. Ing bayung Escudo de Armas ning Parokya megawa ya king pamanantabe ng Fr. Jowel Gatus at Mr. Ricky Baluyut, ing Parish Chronicler; ginulis neng Mr. Adrian Maun, ing secretario ning Parokya, at Mr. Kendrick Ivan Panganiban, ing Ecclesiastical Heraldry Artist. Opisyal yang mipakilala at mebendisyunan ing bayung Parish Logo inyang September 8, 2020, king kafiestan na ning kapanganakan ning Indung Virgen Maria.




*Ring milabas a Parish Logo a megamit kanita king Our Lady of the Holy Rosary Parish*



*Ing bayung Escudo de Armas ning Parokya*

Inumpisan ne rin pagawang Among Jowel Gatus ring misusumangid a retablo ning Altar. Ding adwang malating retablo o “Retablo Menor” ding magsilbing regalal at tanda ning kapasalamatan da ring parokyanus para king ka-30banwang Anibersaryo ning Parokya at ka-500 a banwang Anibersaryo ning Kristyanismu king Pilipinas.



*Ing disenyu ning Retablo Menor na ning Altar ning Our lady of the Holy Rosary Parish*



### **III. Ring pastul NING KASALPANTAYANAN (CURA PAROKO NING PAROKYA)**

**Iti ya ing rekord at pamisunud-sunud da ring meging Kura Paroko ning parokya:**



REV. FR. ARNOLD S. RIVERA

I Among Arnold S. Rivera mibayit ya at meragul king Mabalacat, Pampanga. Iya ing mumunang diling meging Kura Paroko keti king parokya manibat inyang December 13, 1991 anggang November 03, 1996. Ing parokyang iti ing mumuna nang **assignment** Among Arnold keti king Arkidiosesis anting Kura Paroko. Akasaup na la king pamamastul na ring meging pamuntuk ning Parish Pastoral Council (PPC), di **Elpidio G. Calalang** at **Ofrecina F. Intal**. Inyang kayari na ning terminu na keti, milipat ya karin king **San Rafael Arkangel Parish**, Baruya, Lubao, Pampanga.



REV. FR. EXEQUIEL LAUDEMÉR H. MANGUNE

Ing kaduang midistinu anting Kura Paroko apin i Among **Laudemer H. Mangune** a mas kilala king aus a “Among Lauds”. Mibayit ya at meragul king Sta. Ana, Pampanga. **Holy Cross Parish** ing pibatan nang parokya karin king Sapang Bato, Angeles City. Midistinu ya keti king parokya manibat inyang November 5, 1996 anggang November 11, 2011. I **Ofrecina F. Intal** mu naman ing akayantabe na anting **PPC President**. Iya mu ing paring meg-**appoint** Barangay Pastoral Council (BPC) keti king parokya. Kaibat nang memastul keti, milipat yang distinu karin king **San Idefonso Parish**, Balitucan, Magalang, Pampanga.

(12)



REV. FR. RAMON E. MACASIOG

Katlu ne man karing midistinu keti anting Kura Paroko i **Rev. Fr. Ramon E. Macasiog**, a mas popular king awus a “Among Mhon”. Mibayit ya at meragul king Concepcion, Tarlac. Keta king **San Idefonso Parish** ing parokya nang penibatan karin king Balitucan, Magalang. Midistinu ya keti king parokya manibat inyang November 12, 2001 anggung November 06, 2007. Ding meging akasawup nang **PPC Presidents** apin di **Ofrecina F. Intal** at **Atilano C. Mandap**. King Tinabang, Magalang ing pintalan nang parokya inyang kayari na ning terminu na keti anting Kura Paroko.

REV. FR. JOEL E. GAMBOA

*(March 04, 2007 – August 05, 2011)*

Mibayit ya at meragul king Macabebe, Pampanga i Among Joel E. Gamboa. Iya ing kapat a midistinung pari keti king parokya. King **San Agustin Parish** ing penibatan nang parokya karin king Caingin, Masantol. Midistinu ya keti i Among Joel manibat inyang November 08, 2007 anggung August 25, 2011. Di **Jevren O. Baluyut** at **Remedios R. Figueroa** ila ring meging kayantabe nang Among Joel anting **PPC President**. Uli na ning malamal at maragul a sangkan, meg-*leave* ya pa mu kanita pansamantala i Among Joel anting pari keti king Arkidiosis.



(13)



REV. FR. JOSE "JAY" B. BASCON



REV. FR. LARRY S. MIRANDA



REV. FR. ARNOLD S. PUNSALAN

Kanitang megumpisa yang megbakasyon i Among Joel, midistinu la inyang Septyembre 05, 2011 antimong TEAM MINISTRY ring matenakan at mangasipag a atlung (3) pari ibat king **Mother of Good Counsel Seminary (MGCS), Archdiocese of San Fernando**). Ila pin deti ri **Rev. Fr. Arnold S. Punsalan, Rev. Fr. Larry S. Miranda** at **Rev. Fr. Jay B. Bascon**. Ing meging akasawup da king pamamastul anting PPC President apin i **Remedios R. Figueroa** at i **Rufina P. Bondoc**. Inyang dinatang ne ing bayung Kura Paroko, migbalik na la king seminaryu reting TEAM MINISTRY ban isundu ra ing karelang katungkulan anting **Spiritual Directors** at **Formators** karin king **MGCS**.





REV. FR. ARISTOTLE M. MANIAGO

Inyang kayari na ning terminu ra keti ring TEAM MINISTRY, inalilan na lang **Rev. Fr. Aristotle “Aris” M. Maniago** king pamamastul. Iya ing kapitung meging Kura Paroko keti. I Among Aris mibayit ya at meragul king San Agustin, Sta. Ana, Pampanga. Ibat yang midistinu kanita anting Kura Paroko na ning **Lord’s Baptism Parish** karin king Pasig, Candaba, Pampanga. Ketang Mayo 24, 2012, me-*install* ya keti anting Kura Paroko. Ding meging akayantabe na anting PPC President apin di **Emmanuel M. Pineda, Ricky M. Baluyut** at **Remedios R. Figueroa**.

King pamamastul nang Among Aris, miragdag ya ing NAYONG TSINOY COMMUNITY karing barangay a sasakupan ning parokya. Mika-regular yang pamag-Misa at mika-opisyales ning **Chapel Pastoral Council (CPC)** karin. Eksaktu yang atlung (3) banwang sinuyu at memastul keti. Inyang June 2, 2016 milipat ya distinu i Among Aris karin king **Sto. Rosario Parish**, Tinabang, Magalang, Pampanga.

REV. FR. NORMAN S. ARCE

Ketang Hunyo 03, 2016 ing *installation* nang **Rev. Fr. Norman S. Arce** anting kapitung meging Kura Paroko. Mibayit ya at meragul king Sasmuan, Pampanga. Menibatan yang distinu anting Kura Paroko karin king **Sto. Rosario Parish**, Bulacus, Masantol, Pampanga. Ding PPC Presidents a akayantabe na apin di **Ramil Q. Manggay** at **Noel A. Sunga**. Kapamilatan na ning talentu nang Among Norman king larangan ning musika, mekapag-*composed* yang kanta, ing Imno ning “Virgen Sto. Rosario, ing” opisyal a imno ning parokya a mi-*launched* ketang October 7, 2017.



Inyang dinatang ing petsang May 25, 2019, inatad de ring parokyanos i Among Norman king **St. Jude Thaddeus Parish**, St. Jude Village, Dolores, City of San Fernando anting bayung Kura Paroko da Karin.

Kabukasan naman kanita, May 26, 2019, seganan de ring parokyanos keti king ***Our Lady of the Holy Rosary Parish*** i Rev. Fr. Jowel Jomarsus P. Gatus, a mas kilala ra king awus a “Among Prople”. Mibayit ya king Sto. Cristo, Tarlac i Among Propie. Iya ing kawalung meging Kura Paroko.

Ibat yang midistinu i Among Propee king ***Lord’s Epiphany Parish***, San Francisco, Magalang, Pampanga bayu ya mitalaga keti anting bayung Kura Paroko.



REV. FR. JOWEL JOMARSUS P. GATUS

Kaniting oras a misusulat ya iting libru ning kasalesayan, atlumpulung (30) banwa ne iting pangatalakad na ning parokya. Antimurin atlumpulung (30) banwang anibersaryo ning Fiestang Parokya at ing pamagselebra ning Kalimang-dalan a (500) Banwang Anibersaryo ning Kristiyanismo keti king bansang Pilipinas.

Bista’t man makayanad na la king kasalpantayanan at kasuywan ding parokyano, marakal pa ing dapat dang pagobran ding mididistinung Kura Paroko keti.

Tagimpan da ring parokyanos ing manatili sana iting grasyang mitutugtug ban lakwas la pang maging mapagmasabal; maging masipag la king kasuywan da at ban maging dalan ne ning matigik a pamikakalugud, pamamie respetu at masabal karing kaparang tau; king pamanantabe da ring mididistinung Kura Paroko keti at migit king sabla, itang apanatilyan da itang malamal a kasalpantayanan at lugud da king mayupaya at mapamakalulung Dios.

Seliksik at sinulat neng :

**RICARDO M. BALUYUT**

*Parish Chronicler*

Ding makatuki ila ring megsilbing batayan (**reference**) a nung nu ya sinangguni ing menyaliksik at talasulat na niting kasaysayan:

1) Ding sapni o palipi (**heirs**) nang Don Marcos Pineda – Brgy. Sto. Rosario Pau, Sto.Tomas, Pampanga

2) Ding sapni o palipi (**heirs**) nang Santiago Miranda – Brgy. Pandaras, City of San Fernando, Pampanga

3) Google – [www.google.com](http://www.google.com)

4) Rev. Fr. Arnold S. Rivera (*the first-ever Parish Priest*)

5) Jesus C. Catacutan (*former Barangay Chairman*)

6) Maria T. Figueroa

7) **Facebook** – Our Lady of the Holy Rosary Parish Fan Page